

folia coloris, aurium annulis equi cursu trementibus, splendebat ille in regionibus a feris frequentatis.

52. Dei sylvestres, corporibus suis in tenuibus fruticibus latentes, oculorum officio apibus tradito, in via conspiciebant eum, pulchris oculis præditum, gubernatione sua *Kosalenses* exhilarantem.

53. Ingressus est sylvam, in quam venatores cum canum agminibus primo intraverant, incendio et latronibus vacuum, solo firmo et equis commodo præditam, fossis instructam, feris, avibus, taurisque repletam.

54. Tum, sicut *Bhâdras* mensis arcum divinum, fulminis nervo, auri instar flavo, instructum, sic vir eximius, doloris immunis, arcum intensum arripuit, nervi stridore leonum iram excitans.

55. Obtulit se illi agmen caprearum, *kusam* in oribus tenentium, superbo capreolo duce, quarum femellæ identidem in cursu retardabantur a pullis, ubera petentibus.

56. Agmen illud, petatum a rege, qui equo celerrimo vehebatur, sagitta e pharetræ ore exprompta, ordinibus perruptis, sylvam tremulis oculis fuscam reddebant, aquæ instar, loti foliorum copia, a vento dispersa, tectæ.

57. Ille, *HARIS* majestate præditus, arcum tenens, conspiciens cervi, quem sagitta petiturus erat, feminam, corpore suo intercedentem, animo misericordia commoto, sagittam, vel ad aurem usque adductam, cum amore reposuit.

58. Pugnus ejus, in alios cervos sagittas emittere cupientis, ad aurem adductus, firmiterque compressus, sponte aperiebatur, quia illi oculis suis, præ metu valde trementibus, gratos fervidæ puellæ oculorum motus in memoriam ejus revocabant.

59. Prosecutus est ille effugientium aprorum agminis, e frigido paludis limo prosilientis, viam, abruptorum *mustæ* culmorum partibus sparsam, longisque pedum madentium lineis distinctam.

60. Contra illum, qui corpus superius leniter de equo inclinans sagittam emisit, apri, horrentibus setis tecti, pugnare cupiebant neque semet ipsos sagittis, crura transfodientibus, subito arboribus affixos sentiebant.

61. Emisit ille in tauri feri, eum adoriri cupientis, oculi cavum sagittam,